



KNATTSPYRNUSAMBAND ÍSLANDS

Aðildarfélög KSÍ
b.t. formanna/framkvæmdastjóra

Reykjavík, 10. mars 2017

Breytingar á reglugerð KSÍ um knattspyrnumót

Ágætu félagar,

Á fundi stjórnar KSÍ 22. febrúar sl. samþykkti stjórn KSÍ margþættar breytingar á reglugerð KSÍ um knattspyrnumót. Breytingar þessar eru annars vegar til samræmis við samþykktir ársþings KSÍ 2014 og hins vegar til samræmis við samþykktir ársþings KSÍ 2017.

Breytingar eru þessar:

1. Ný ákvæði um heimaalda leikmenn.
2. Breytingar á reglum er varða bikarkeppni KSÍ.
3. Breytingar og reglum um skráningu liða til keppni í Íslandsmóti yngri flokka.
4. Breytingar á reglum um 5. flokk karla og kvenna – knattspyrna í 8 manna liðum.
5. Bráðabirgðaákvæði um þrjá eldri leikmenn hverjum leik í 2. flokki kvenna mun áfram gilda fyrir árið 2017.

Eftirfarandi er yfirlit yfir breytingarnar og samantekt:

Reglugerð KSÍ um knattspyrnumót (ný og breytt ákvæði) – Heimaaldir leikmenn

9.gr.

Leikskýrsla

- 9.1. Leikskýrsla skal gerð á vef KSÍ en til vara á eyðublöðum útgefnum af KSÍ og skal farið að leiðbeiningum KSÍ við útfyllingu hennar.
- 9.2. Í Pepsi-deild karla og 1. deild karla skulu þau félög sem taka þátt senda KSÍ A- og B leikmannalista sbr. hér að neðan yfir þá leikmenn sem hafa keppnisleyfi með viðkomandi félagi skv. leiðbeiningum KSÍ viku fyrir fyrsta leik í viðkomandi deild. Aðeins leikmenn skráðir á leikmannalista A eða leikmannalista B geta verið skráðir á leikskýrslu í leikjum í Pepsi-deild karla og 1. deild karla.
 - 9.2.1. Á leikmannalista A skal skrá að hámarki 25 leikmenn og skulu 8 af þeim hafa verið skráðir hjá aðildarfélögum KSÍ á aldurstímabilinu 15 ára (eða frá upphafi þess keppnistímabils sem leikmaður verður 15 ára) – 21 árs (eða til loka þess keppnistímabils þegar leikmaður verður 21 árs), samfelld eða samtals í 36 mánuði og þar af a.m.k. 4 af þessum 8 leikmönnum hjá því félagi sem í hlut á. Breyta má skráningu á leikmannalista A í félagaskiptatímabilum eða þegar leikmanni er veitt keppnisleyfi.
 - 9.2.2. Á leikmannalista B má skrá ótakmarkaðan fjölda leikmanna sem verða 21 árs á almanaksárinu eða eru yngri og hafa verið skráðir hjá því félagi sem í hlut á samfelld í a.m.k. 24 mánuði frá því þeir urðu 15 ára (eða frá upphafi þess keppnistímabils sem leikmaður verður 15 ára). Skrá má leikmenn á listann sem hafa keppnisleyfi með viðkomandi félagi í 3. aldursflokki. Bæta má leikmanni á B leikmannalista hvenær sem er á keppnistímabilinu svo fremi sem hann hafi keppnisleyfi með viðkomandi félagi.

- 9.3. Í keppni 7, 8 og 11 manna liða mega varamenn ekki vera fleiri en 5 og skulu þeir skráðir á leikskýrslu sem og nöfn allt að 5 manna í liðsstjórn. Í meistaraflokki mega varamenn þó vera allt að 7 og allt að 7 menn í liðsstjórn. Á leikskýrsluna skal tilgreina kennitölu leikmanna og forráðamanna (fæðingardag í tilfelli útlendinga).
- 9.4. Áður en leikur hefst skal forráðamaður heimaliðs afhenda dómara útfyllta leikskýrslu með númerum og nöfnum þeirra leikmanna sem hefja eiga leik, auk tilnefndra varamanna og nöfnum liðsstjórnar. Númer hvers og eins leikmanns skal tilgreint á leikskýrslunni í samræmi við númer á keppnisbúningi þannig þó að engir leikmenn sama liðs beri sama númer. Leikmaður skal bera númer 1 til 99 og skal númerið 1 aðeins úthlutað markverði.
- 9.5. Leikmenn sem leika í Pepsi-deild eða 1. deild karla eða Pepsi-deild kvenna skulu hafa sama númer í öllum leikjum í deildinni og einnig þegar þeir taka þátt í bikarkeppni KSÍ í meistaraflokki. Hvert númer skal aðeins úthlutað einum leikmanni. Félög í viðkomandi deildum skulu tilkynna KSÍ um númer leikmanna fyrir 1. maí ár hvert eða fyrir fyrsta leik ef hann er fyrir.
- 9.6. Að leik loknum gengur dómari frá leikskýrslu og skráir hana í gagnagrunn KSÍ. Hann skal skrá allar nauðsynlegar upplýsingar á skýrsluna skv. fyrirmælum KSÍ sem og hverjir hafi gerst brotlegir skv. agareglum KSÍ. Í meistaraflokki og öðrum þeim leikjum þar sem dómari er tilnefndur af KSÍ skal dómari sjá um skýrsluskil en heimalið í öðrum leikjum. Leikskýrsluna skal setja í póst eigi síðar en næsta virka dag eftir leik eða henni skilað skv. fyrirmælum KSÍ.
- 9.7. Félögum ber skylda til að skrá upplýsingar á leikskýrslum í heimaleikjum sínum í gagnagrunn KSÍ sem hér greinir:
 - a) Úrslit leiks skulu skráð strax að leik loknum.
 - b) Allar upplýsingar á leikskýrslu í meistaraflokki skulu skráðar innan tveggja klukkustunda frá því að leik lýkur.
 - c) Í keppni 7 og 11 manna liða (öðrum en meistaraflokki) skal skrá upplýsingar á leikskýrslu innan sólarhrings frá því að leik lýkur. Nauðsynlegt er að skrá áminningar, brottvísanir og nöfn dómara.
 - d) Til þess að félag geti tekið þátt í úrslitakeppni þarf félagið að hafa lokið skráningu á leikskýrslum allra keppnisliða í viðkomandi aldursflokki.

Samantekt

Framangreindar breytingar á 9. gr. fela í sér í nú ber félögum í Pepsi-deild karla og Inkasso-deild karla að senda til KSÍ, viku fyrir fyrsta leik, svokallaða A- og B leikmannalista. Leikmannalistarnir eru nánar skilgreindir í ákvæðum 9.2.1. og 9.2.2. en aðeins þeir leikmenn sem þar eru skráðir geta verið á leikskýrslu í leikjum í Pepsi-deild karla og Inkasso-deild karla. Breytingar á 9. gr. fela einnig í sér að leikmönnum er nú heimilt að bera númer frá 1 til 99 en þó skal númerið 1 aðeins úthlutað markverði. Félög í viðkomandi deildum skulu tilkynna KSÍ um númer leikmanna fyrir 1. maí ár hvert eða fyrir fyrsta leik ef hann er fyrir.

Reglugerð KSÍ um knattspyrnumót (breytt ákvæði) – Bikarkeppni KSÍ

23.2. Bikarkeppni KSÍ

- 23.2.1. Þátttaka í bikarkeppni KSÍ er heimil öllum aðildarfélögum KSÍ.
- 23.2.2. Hverju félagi er heimilt að senda eitt lið til keppni
- 23.2.3. Keppt skal samkvæmt útsláttarfyrirkomulagi, þannig að sigurvegari leiks heldur áfram keppni en taplið er úr leik. Í keppninni skal leikið til þrautar. Sé jafnt eftir venjulegan leiktíma skal framlengt og sé enn jafnt skal fara fram vítaspyrnukeppni.
- 23.2.4. Draga skal um hvaða lið mætast og skal það lið sem dregið er á undan leika á heimavelli sbr. þó gr. 23.2.6. Keppnin skal vera tvískipt:
 - a. Undankeppni
 - b. Aðalkeppni
- 23.2.5. Í undankeppni taka þátt öll lið nema þau, sem taka þátt í Pepsi-deild. Svæðakeppni skal viðhöfð í undankeppninni og keppni liðanna hagað svo, að 20 lið komist áfram í aðalkeppnina. Skal undankeppni lokið fyrir miðjan júní.

- 23.2.6. Aðalkeppnin (32-liða úrslit) skal hefjast eftir miðjan apríl og hefja þá liðin sem leika í Pepsi-deild þátttöku. Mótanefnd skal jafnframt heimilt í vissum tilfellum að ákveða að leikur fari fram á hlutlausum velli ef rökstudd ósk þess efnis berst frá báðum aðilum sökum fjarlægðar eða annarra ástæðna.
- 23.2.7. Úrslitaleikur bikarkeppninnar skal fara fram á Laugardalsvelli í ágúst eða september. Mótanefnd annast framkvæmd leiksins í samráði við leikaðila.
- 23.2.8. Mótanefnd er heimilt að gera breytingar á niðurröðun leikja eftir 8 liða úrslit bikarkeppninnar með tilliti til þátttöku liða í Evrópukeppni á eftirfarandi forsendum: Hafi lið spilað 6 leiki á undangengnum þremur vikum eða innan 48 tímar liðið frá lokum ferðalags vegna þátttöku í Evrópukeppni hefur mótanefnd heimild til þess að færa leikdaga, óski félag eftir frestun.
- 23.2.9. Tekjur af seldum aðgöngumiðum og tekjur af útvarpi og sjónvarpi skulu skiptast jafnt milli leikaðila. Allar aðrar tekjur skulu renna til heimaliðs, nema leikaðilar komist að öðru samkomulagi. Um aðgöngumiða gilda sömu ákvæði og í Íslandsmóti eftir því sem við á
- 23.2.10. Venjulegur kostnaður við leiki, þ. e. 20% framkvæmdagjald til heimaliðsins, ferðakostnaður keppnisliða (fargjald fyrir allt að 22) og ferða- og uppihaldskostnaður dómara greiðist að jöfnu af báðum leikaðilum. Aðkomulið skal gæta hagkvæmni í ferðakostnaði og getur ferðakostnaður aldrei numið hærri upphæð en sem nemur fargjaldi frá viðurkenndu rútufyrirtæki og/eða kostnaði við siglingu á umræddri leið. Sé ferðakostnaður hærri skal aðkomulið bera kostnað af mismun.
- 23.2.11. Hugsanlegt tap greiðist af leikaðilum að jöfnu. Verði að aflýsa leik, gilda sömu ákvæði og í Íslandsmóti.
- 23.2.12. Af leikjum í aðalkeppni skal greiða gjald í sameiginlegan sjóð af nettótekjum þar sem til tekna eru aðeins taldir seldir aðgöngumiðar, sem hér segir:
Af leikjum í 2. umferð aðalkeppni 10%.
Af leikjum í 3. umferð aðalkeppni 10%.
Af undanúrslitaleikjum 15%.
Af úrslitaleik 15%.
- 23.2.13. Sameiginlega sjóðnum, sem skal vera í vörslu KSÍ, skal skipt þannig að fyrst er greitt tap, sem þátttökuaðilar hafa orðið fyrir, og skal greitt hlutfallslega nægi sjóðurinn ekki fyrir öllu tapinu. Verði afgangur, skiptast eftirstöðvarnar milli þátttökuaðila í hlutfalli við greiðslur í sjóðinn.
- 23.2.14. Í úrslitaleik skulu leikaðilar eiga rétt á öllu auglýsingasvæði við leikvöllinn. KSÍ skal þó eiga rétt á 40 metra auglýsingasvæði miðsvæðis meðfram langlið vallar og 20 metra til hvors enda fyrir fasta styrktaraðila. Svæði því sem kemur í hlut leikaðila, skulu þeir skipta með sér til helminga og hljóta óskiptar tekjur hvor fyrir sig af sölu eigin svæðis, nema leikaðilar komist að öðru samkomulagi.
- 23.2.15. Stjórn KSÍ ákveður á hverju ári hvert skuli vera nafn bikarkeppninnar.

Samantekt

Framangreindar breytingar á grein 23.2. fela í sér að 32-liða úrslit í bikarkeppni KSÍ skuli hefjast eftir miðjan apríl en áður sagði í greininni að 32-liða úrslit í bikarkeppni skuli hefjast eftir miðjan júní. Þá segir nú í sömu grein í mótanefnd sé heimilt að ákveða að leikur fari fram á hlutlausum velli ef rökstudd ósk þess efnis berst frá báðum aðilum sökum eða annarra ástæðna. Framangreindar breytingar á grein 23.2. fela einnig í sér breytingar á fyrirkomulagi um skiptingu ferðakostnaðar við leiki í bikarkeppni KSÍ. Samkvæmt því getur ferðakostnaður aldrei numið hærri upphæð en sem nemur fargjaldi frá viðurkenndu rútufyrirtæki og/eða kostnaði við siglingu á umræddri leið. Sé ferðakostnaður hærri skal aðkomulið bera kostnað af mismun.

Reglugerð KSÍ um knattspyrnumót (ný ákvæði) – Skáning liða í Íslandsmóti yngri flokka

26.gr.

3. flokkur karla

- 26.1.5. Mótanefnd er heimilt að veita félagi, sem skráir tvö lið til keppni, undanþágu til að lið 2 leiki sem C lið. Með umsókn um undanþágu þarf að fylgja rökstuðningur sem m.a. tekur mið af þátttöku og árangri í undangengnum mótum, fjölda iðkenda o.s.frv. Rökstuðningur skal fylgja þátttökutilkynningu.
- 26.1.6. Lið sem veitt hefur verið undanþága til að leika sem C lið, sbr. ákvæði 26.1.5, er óheimilt að taka þátt í úrslitakeppni Íslandsmóts.

27.gr.

4. flokkur karla

- 27.1.3. Mótanefnd er heimilt að veita félagi, sem skráir tvö lið til keppni, undanþágu til að lið 2 leiki sem C lið. Með umsókn um undanþágu þarf að fylgja rökstuðningur sem m.a. tekur mið af þátttöku og árangri í undangengnum mótum, fjölda iðkenda o.s.frv. Rökstuðningur skal fylgja þátttökutilkynningu.
- 27.1.4. Lið sem veitt hefur verið undanþága til að leika sem C lið, sbr. ákvæði 27.1.3, er óheimilt að taka þátt í úrslitakeppni Íslandsmóts.

28.gr.

5. flokkur karla

- 28.1.4. Mótanefnd er heimilt að veita félagi undanþágu til að skrá lið til keppni með eftirfarandi hætti:
- Félag sem skráir eitt lið til keppni getur óskað eftir að það leiki sem B lið.
 - Félag sem skráir tvö lið til keppni getur óskað eftir að lið 2 leiki sem C lið.
 - Félag sem skráir þrjú lið til keppni getur óskað eftir að lið 3 leiki sem D lið.
- Með umsókn um undanþágu þarf að fylgja rökstuðningur sem m.a. tekur mið af þátttöku og árangri í undangengnum mótum, fjölda iðkenda o.s.frv. Rökstuðningur skal fylgja þátttökutilkynningu.
- 28.1.5. Lið sem veitt hefur verið undanþága til að leika sem B, C eða D lið, sbr. ákvæði 28.1.4, er óheimilt að taka þátt í úrslitakeppni Íslandsmóts.

36.gr.

5. flokkur kvenna

- 36.1.4. Mótanefnd er heimilt að veita félagi undanþágu til að skrá lið til keppni með eftirfarandi hætti:
- Félag sem skráir eitt lið til keppni getur óskað eftir að það leiki sem B lið.
 - Félag sem skráir tvö lið til keppni getur óskað eftir að lið 2 leiki sem C lið.
 - Félag sem skráir þrjú lið til keppni getur óskað eftir að lið 3 leiki sem D lið.
- Með umsókn um undanþágu þarf að fylgja rökstuðningur sem m.a. tekur mið af þátttöku og árangri í undangengnum mótum, fjölda iðkenda o.s.frv. Rökstuðningur skal fylgja þátttökutilkynningu.
- 36.1.5. Lið sem veitt hefur verið undanþága til að leika sem B, C eða D lið, sbr. ákvæði 36.1.4, er óheimilt að taka þátt í úrslitakeppni Íslandsmóts.

Samantekt

Framangreindar breytingar á greinum 26 og 27 fela í sér að mótanefnd er heimilt að veita félögum, sem skrá tvö lið til keppni í 3. flokki karla og/eða 4. flokki karla, undanþágu til að lið 2 leiki sem C lið. Með umsókn um slíka undanþágu þarf að fylgja rökstuðningur sem m.a. tekur mið af þátttöku og árangri í undangengnum mótum, fjölda iðkenda o.s.frv. Skal rökstuðningur fylgja þátttökutilkynningu.

Framangreindar breytingar fela einnig í sér að mótanefnd er heimilt að veita félögum, sem skrá eitt lið til keppni í 5. flokki karla og/eða 5. flokki kvenna, undanþágu til að það leiki sem B lið. Jafnframt er mótanefnd heimilt að veita félögum í 5. flokki karla og/eða 5. flokki kvenna, sem skrá tvö lið til keppni, undanþágu til að lið 2 leiki sem C lið. Loks er mótanefnd heimilt að veita félögum í 5. flokki karla og/eða

5. flokki kvenna, sem skrá þrjú lið til keppni, undanþágu til að lið 3 leiki sem D lið. Með umsókn um slíkar undanþágur þarf að fylgja rökstuðningur sem m.a. tekur mið af þátttöku og árangri í undangengnum mótum, fjölda iðkenda o.s.frv. Skal rökstuðningur fylgja þátttökutilkynningu.

Reglugerð KSÍ um knattspyrnumót (breytt ákvæði) – 8 manna lið í 5. flokki karla og kvenna

28.gr.
5. flokkur karla

8 MANNA LIÐ

Aldur: 12 ára á almanaksárinu og yngri.

Leiktími: 40 mín. (2 x 20 mín.)

Leikhlé: 5 mín.

Framlenging: 15 mín. (2 x 7.5 mín.)

Leikmannaskipti: Skv. reglugerð KSÍ um knattspyrnu í 7- og 8 manna liðum.

Stærð knattar: 4.

Keppni fer fram skv. reglugerð KSÍ um knattspyrnu í 7- og 8 manna liðum.

28.1. Íslandsmót

28.1.1. Leikreglur skulu fylgja knattspyrnulögunum og reglugerð KSÍ um knattspyrnumót nema annað sé tekið fram í reglugerð KSÍ um knattspyrnu í 7- og 8 manna liðum.

36.gr.
5. flokkur kvenna

8 MANNA LIÐ

Aldur: 12 ára á almanaksárinu og yngri.

Leiktími: 40 mín. (2 x 20 mín.)

Leikhlé: 5 mín.

Framlenging: 15 mín. (2 x 7.5 mín.)

Skiptingar: Skv. reglugerð KSÍ um knattspyrnu í 7- og 8 manna liðum.

Stærð knattar: 4.

Keppni fer fram skv. reglugerð KSÍ um knattspyrnu í 7- og 8 manna liðum.

Samantekt

Framangreindar breytingar fela í sér að 5. flokkur karla og kvenna munu nú spila í 8 manna liðum á Íslandsmótinu í knattspyrnu í stað þess að spila í 7 manna liðum. Spilað er áfram eftir sömu reglum og viðmiðum og hafa verið í gildi um knattspyrnu í 7 manna liðum nema að því leyti að 8 leikmenn leika inn á vellið í stað 7.

Reglugerð KSÍ um knattspyrnumót (bráðabirgðaákvæði) – Eldri leikmenn í 2. flokki kvenna

33.gr.

2. flokkur kvenna

11 MANNA LIÐ

Aldur: 19 ára á almanaksárinu og yngri.


Ákvæði til bráðabirgða 2017:

Heimilt er að hafa þrjá eldri leikmenn í hverjum leik í 2. aldursflokki kvenna, sem eru 20 - 22 ára á almanaksárinu (konur fæddar 1995, 1996 og 1997) og léku ekki með meistaraflokki félagsins í næsta leik á undan.

Samantekt

Bráðbirgðaákvæðið er samhljóma því sem var í gildi fyrir árið 2016. Ákvæðið heimilar félögum í 2. flokki kvenna að hafa þrjá eldri leikmenn í hverjum leik, sem eru 20-22 ára á almanaksárinu (konur fæddar 1995, 1996 og 1997), og léku ekki með meistaraflokki félagsins í næsta leik á undan.

Ef frekari upplýsinga er óskað þá vinsamlegast hafið samband við undirritaðan.



Haukur Hinriksson,
lögfræðingur hjá KSÍ.